



Terenga 3: Hōtaka 28 – Kupu Whakakaha

He Mihi

Kei ngā rau kawakawa o ngā wao tapu a Tāne, nau mai ki te nehenehe o Ako. Rāpoia ō tātou manako kia ora i a tātou te taonga kāmehameha i waiho mai ai e ō tātou tūpuna hei raupī mā tātou.

Hei Mahi Whakarongo

Kua tīpakohia te kiriata o te rā i tētehi o ngā hōtaka o Te Kāuta. Ko te kaikōrero ko Jim Perry. Ko te kaupapa, ko ana wheako hei hōia. Anei ngā pātai hei whakautu mā koutou:

- 1) I whakangungua rātou ki hea?
- 2) He 'cadet' a Jim?
- 3) Me aha rātou e pīataata ai ngā pūtu?

He Whakamārama

Tirohia ngā rerenga e whai ake nei. Kua tohua te kupu whakakaha i roto i ia rerenga kōrero:

- a) Ko koe **tonu** rā tōu nā kaipatu e!
- e) Te ātaahua **hoki**!
- i) **Anō** te pai o te noho tahi a te tuakana me te teina.
- o) Ka pai **kē** tō mahi, e hine!
- u) E kore **rawa** au e whakaae.

Ko ēnei ngā pū hei whakakaha i te kōrero. Kāore he whakapākehātanga kotahi ki ēnei kupu.

Hei Mahi

Whakatikahia te takoto o ngā kupu kei roto i ngā rerenga nanu e whai ake nei. Kua whai pū matua te kupu tuatahi o ia rerenga.

1. pōwhiri i rawa panekoti Me te tātou pango mau
2. tonu tamariki mai hari Mā e koutou koutou ā
3. tēnei hoki whenua He kē ātaahua
4. waka Anō o nui tēnā te
5. hoki Ko atu wai?

He Whakautu:

1. Me mau panekoti pango rawa tātou i te pōwhiri?
2. Mā koutou tonu ā koutou tamariki e hari mai.
3. He ātaahua kē hoki tēnei whenua.
4. Anō te nui o tēnā waka!
5. Ko wai atu hoki?